



AKTUELNOSTI

Tužilaštvo Brčko distrikta BiH bilo domaćin Strateškog foruma Održan 27. sastanak rukovodilaca tužilaštava i policijskih tijela u BiH

Tužilaštvo Brčko distrikta BiH bilo je domaćin 27. redovnog sastanka rukovodilaca tužilaštava i policijskih tijela na strateškom nivou održanog 13. marta u Brčkom. Ovaj vid saradnje tužilaštava i policije realizira se u okviru aktivnosti Projekta „Jačanje tužilačkih kapaciteta u sistemu krivičnog pravosuđa“, koji implementira Visoko sudsko i tužilačko vijeće (VSTV) Bosne i Hercegovine.

Sastanku u okviru Strateškog foruma prisustvovali su: glavni tužilac Tužilaštva BiH Milanko Kajganić, glavni federalni tužilac Federalnog tužilaštva FBiH Munib Halilović, v.d. glavni republički tužilac Republičkog javnog tužilaštva Republike Srpske Miodrag Bajić, direktor Državne agencije za istrage i zaštitu (SIPA) Darko Ćulum, ispred Federalne uprave policije v.d. direktor Ensad Korman, direktor Ministarstva unutrašnjih poslova Republike Srpske Siniša Kostrešević, šef Policije Brčko distrikta BiH Goran Pisić, domaćin sastanka - glavni tužilac Tužilaštva Brčko distrikta BiH Zekerija Mujkanović, te predstavnici projekta Amila Rahić i Aleksandra Todorović.

Na današnjem sastanku učesnici Strateškog foruma potpisali su Sporazum o usvajanju i primjeni Uputstva o postupanju tužioca i ovlaštenog službenog lica u otkrivanju krivičnog djela, počinioca i sprovođenju istrage. Novim uputstvom o saradnji tužilaštava i policijskih agencija, između ostalog, unaprijeđena su rješenja o obavještanju tužioca o krivičnim djelima. U tom smislu, usvojena je forma obavještanja kojim se tužiocu stavlja na raspolaganje dovoljan kvalitet informacije i materijala za donošenje odluke o sprovođenju ili nesprovođenju istrage. S druge strane, tužioci će imati obavezu obavijestiti policijsku agenciju o donošenju naredbe o obustavi istrage, te joj po okončanju postupaka pred sudom dostavljati presude, radi ujednačavanja standarda u radu obiju institucija i njihovog usklađivanja sa stavovima sudske prakse.

Strateški forum rukovodilaca tužilaštava i policijskih tijela koji je održan, ponovo je potvrdio ovaj vid saradnje kao efikasan, pa će se i u narednom periodu nastaviti dosadašnja praksa ujednačavanja stavova i podjele najboljih praktičnih iskustava među institucijama.

**GLAVNI TUŽILAC
ZEKERIJA MUJKANović**